

მემორანდუმი

მონაცემების მიწოდების თაობაზე

ქალაქ რუსთავის მუნიციპალიტეტის მერიასა და სსიპ – სოციალური მომსახურების სააგენტოს

13 აპრილი 2016 წელი

ერთი მხრივ საქართველოს შრომის, ჯანმრთელობისა და სოციალური დაცვის სამინისტროს სახელმწიფო კონტროლს დაქვემდებარებულ სსიპ – სოციალური მომსახურების სააგენტოსათვის (შემდგომში – „სააგენტო“) წარმოდგენილი დირექტორის მოადგილის მოვალეობის შემსრულებლის ბატონი კობა სონდულაშვილის სახით,

მეორე მხრივ ქალაქ რუსთავის მუნიციპალიტეტის მერია (შემდგომში – მერია), წარმოდგენილი ქალაქ რუსთავის მუნიციპალიტეტის მერის მოადგილის ბატონი ლაშა ლობჯანიძის სახით

შემდგომში ერთობლივად წოდებული მხარეებად.

ვხელმძღვანელობთ რა, საქართველოში მოქმედი კანონმდებლობით, მათ შორის „პერსონალური მონაცემების დაცვის შესახებ“ საქართველოს კანონის მე-5 მუხლით, „სოციალური დახმარების შესახებ“ საქართველოს კანონით, საქართველოს მთავრობის 2010 წლის 24 აპრილის N126 დადგენილებით დამტკიცებული „სოციალურად დაუცველი ოჯახების მონაცემთა ერთიან ბაზაში ფორმირების წესი“-ს პირველი მუხლის მე-2 პუნქტით, მე-7 მუხლით და მე-8 მუხლის მე-3 პუნქტით, საქართველოს ორგანული კანონის „ადგილობრივი თვითმმართველობის კოდექსის“ 54-ე მუხლის პირველი ნაწილის „ე.ბ.“ და „ე.გ.“ ქვეპუნქტების, „ქალაქ რუსთავის მუნიციპალიტეტის მერიის დებულების დამტკიცების შესახებ“ ქალაქ რუსთავის მუნიციპალიტეტის საკრებულოს 2014 წლის 8 აგვისტოს N9 დადგენილების მე-7 მუხლის პირველი პუნქტის „ე.ბ.“ და „ე.გ.“ ქვეპუნქტებისა და მე-8 მუხლის მე-3 ქვეპუნქტის შესაბამისად და „ქალაქ რუსთავის მუნიციპალიტეტის 2016 წლის პროგრამების დამტკიცების შესახებ“ ქალაქ რუსთავის მუნიციპალიტეტის საკრებულოს 2015 წლის 25 დეკემბრის N664 განკარგულების უზრუნველყოფის მიზნით და საქართველოს შრომის, ჯანმრთელობისა და სოციალური დაცვის მინისტრის 2007 წლის 27 ივნისის N190/6

ბრძანებით დამტკიცებული სსიპ – სოციალური მომსახურების სააგენტოს დებულებით მონიჭებული უფლებამოსილების ფარგლებში, ვთანხმდებით შემდეგზე:

მუხლი 1. მემორანდუმის საგანი

1.1. მემორანდუმის საგანია საქართველოს მოქმედი კანონმდებლობის საფუძველზე „სააგენტოს“ მიერ ადმინისტრირებადი „სოციალურად დაუცველი ოჯახების მონაცემთა ერთიან ბაზაში“ (შემდგომში – მონაცემთა ბაზა) რეგისტრირებული, 0-დან 150001-მდე სარეიტინგო ქულის მქონე, ქალაქ რუსთავში მცხოვრები ოჯახების შესახებ ინფორმაციის (მონაცემების) მიწოდების შესაძლებლობა „მერიისათვის“, შემდეგი პირობებით:

1.1.1. „მონაცემთა ბაზაში“ რეგისტრირებული, ქალაქ რუსთავში მცხოვრები ოჯახები, მათი წევრ(ებ)ის ინდივიდუალური ინფორმაციის (მონაცემების) მითითებით;

1.1.2. ამ მუხლის 1.1.1 ქვეპუნქტით გათვალისწინებული ინფორმაციის (მონაცემების) დამუშავება ცხრილში დამოუკიდებელი ველების სახით შემდეგი მონაცემების ასახვა:

- ა) ოჯახის საიდენტიფიკაციო ნომერი;
- ბ) ოჯახის უფლებამოსილი წარმომადგენელი (სახელი, გვარი, პირადი ნომერი);
- გ) ოჯახის ფაქტიური საცხოვრისის მისამართი;
- დ) ოჯახის სარეიტინგო ქულა;
- ე) სარეიტინგო ქულის მინიჭების თარიღი;
- ვ) ოჯახის წევრის ნომერი ოჯახში;
- ზ) ოჯახის წევრის პირადი ნომერი;
- თ) ოჯახის წევრის სახელი;
- ი) ოჯახის წევრის გვარი;
- კ) ოჯახის წევრის დაბადების თარიღი;
- ლ) ოჯახის წევრის სქესი.

მუხლი 2. ინფორმაციის მიწოდების წესი

2.1. „სააგენტო“ „მერიისათვის“, ამ მემორანდუმის პირველი მუხლით გათვალისწინებული ინფორმაციის (მონაცემების) მიწოდებას უზრუნველყოფს მემორანდუმით გათვალისწინებული პირობების შესაბამისად.

2.2. ინფორმაციის მიწოდება ხორციელდება ყოველთვიურად. არაუგვიანეს საანგარიშო თვის მომდევნო თვის 5 (ხუთი) რიცხვისა, „სააგენტო“ უზრუნველყოფს „მერიისათვის“ განახლებული ცხრილების მიწოდებას, რომელშიც ასახული უნდა იყოს მონაცემთა ბაზაში რეგისტრირებული ოჯახების შესახებ ინფორმაცია, საანგარიშო თვის 25 (ოცდახუთი) რიცხვის მდგომარეობის მიხედვით, ამ მემორანდუმის პირველი მუხლით გათვალისწინებული ინფორმაციის (მონაცემების) შესაბამისად.

2.3. „მერიისათვის“ მონაცემების მიწოდება ხორციელდება ელექტრონული ინფორმაციის პორტატული მატარებლის (კომპაქტ დისკი და სხვა) საშუალებით.

მუხლი 3. მხარეთა უფლებები და ვალდებულებები

3.1. საქართველოს კანონმდებლობისა და წინამდებარე მემორანდუმის ფარგლებში „სააგენტო“ კისრულობს ვალდებულებას:

3.1.1. პირველი მუხლით გათვალისწინებული ინფორმაციის (მონაცემების) მიწოდება უზრუნველყოს ამ მემორანდუმით დადგენილი პირობების შესაბამისად;

3.1.2. მაქსიმალურად შეუწყოს ხელი და არ დაუშვას რაიმე დაბრკოლების შექმნა „მერიისათვის“ მონაცემების მიწოდების დროს, გარდა მოქმედი კანონმდებლობით და/ან აუცილებელი საჭიროებით გათვალისწინებული შემთხვევებისა. აუცილებელ საჭიროებას განსაზღვრავს „სააგენტო“, რაც უნდა უკავშირდებოდეს მოქმედი კანონმდებლობით „სააგენტოზე“ დაკისრებული ფუნქცია - მოვალეობების შესრულების პროცესში წამოჭრილ/არსებულ საკითხებს;

3.1.3. საჭიროების შემთხვევაში, გამოყოს „მერიასთან“ საკონტაქტო პირი;

3.1.4. დროულად განიხილოს „მერიის“ მიერ წამოჭრილი პრობლემები, რომლებიც უკავშირდება წინამდებარე მემორანდუმით გათვალისწინებულ ურთიერთობებს;

3.1.5. კეთილსინდისიერად და ჯეროვნად შეასრულოს წინამდებარე მემორანდუმის პირობები

3.1.6. „მერიისათვის“ მიწოდებული ინფორმაციის (მონაცემების) სისწორეზე, რაც გულისხმობს, რომ მიწოდებული ინფორმაცია (მონაცემები) უნდა შეესაბამებოდეს, მიწოდების დროს „მონაცემთა ბაზაში“ დაცულ ინფორმაციას (მონაცემებს).

3.2. „სააგენტო“ უფლებამოსილია:

3.2.1. შეაჩეროს მონაცემების მიწოდება „მერიისათვის“ თუ ეს განპირობებულია მისი ტექნიკური ინფრასტრუქტურის ცვლილების და/ან არსებული ხარვეზის გასასწორებლად, აგრეთვე ამ მუხლის 3.1.2. პუნქტით გათვალისწინებულ შემთხვევებში, რის თაობაზეც აცნობებს „მერიას“;

3.2.2. შეწყვიტოს მონაცემების გაცემა, თუ მისთვის ცნობილი გახდა „მერიის“ მიერ პირველი მუხლით გათვალისწინებული მონაცემების არამიზნობრივად გამოყენების ფაქტები;

3.2.3. „მერიას“ მოსთხოვოს მემორანდუმის პირობების შესრულების მონიტორინგისთვის აუცილებელი ინფორმაციის წარმოდგენა.

3.3. საქართველოს კანონმდებლობისა და წინამდებარე მემორანდუმის ფარგლებში „მერია“ კისრულობს ვალდებულებას:

3.3.1. მემორანდუმის პირველი მუხლით გათვალისწინებული მონაცემები (ინფორმაცია) გამოიყენოს მხოლოდ მოქმედი კანონმდებლობით მისთვის დაკისრებული ფუნქციების შესრულების მიზნით, წინააღმდეგ შემთხვევაში, სრული პასუხისმგებლობა ეკისრება „მერიას“;

3.3.2. არ დაუშვას მიღებული ინფორმაციის (მონაცემების) გადაცემა სხვა მესამე პირზე, ან ნებისმიერი სხვა ფორმით გამჟღავნება, გარდა მოქმედი კანონმდებლობით გათვალისწინებული შემთხვევებისა, წინააღმდეგ შემთხვევაში, სრული პასუხისმგებლობა ეკისრება „მერიას“;

3.3.3. მიღებულ ინფორმაციაში (მონაცემებში) არ შეიტანოს რაიმე ცვლილება და/ან კორექტირება;

3.3.4. საჭიროების შემთხვევაში, გამოყოს „სააგენტოსთან“ საკონტაქტო პირი;

3.3.5. დროულად განიხილოს „სააგენტოს“ მიერ წამოჭრილი პრობლემები, რომლებიც უკავშირდება წინამდებარე მემორანდუმით გათვალისწინებულ ურთიერთობებს;

3.3.6. შესაძლებლობის ფარგლებში ხელი შეუწყოს „სააგენტოს“ ამ მემორანდუმით გათვალისწინებული ვალდებულებების შესრულებაში;

3.3.7. მიაწოდოს „სააგენტოს“ მის მიერ მოპოვებული ან მის ხელთ არსებული ინფორმაცია, რომელიც უკავშირდება „სააგენტოს“ მიერ მიწოდებულ მონაცემებში/ინფორმაციაში არსებულ ხარვეზს ან მათ სრულყოფას;

3.3.8. ზედმიწევნით და განუხრელად დაიცვას წინამდებარე მემორანდუმის პირობები.

3.4. „მერია“ უფლებამოსილია:

3.4.1. მოსთხოვოს „სააგენტოს“ ამ მემორანდუმით გათვალისწინებული მონაცემების (ინფორმაციის) დროული მიწოდება, მემორანდუმით დადგენილი პირობების შესაბამისად;

3.4.2. გამოიყენოს მოწოდებული ინფორმაცია (მონაცემები) საქართველოს მოქმედი კანონმდებლობით მინიჭებული უფლებამოსილების განხორციელების მიზნით.

მუხლი 4. დამატებითი პირობები

4.1. წინამდებარე მემორანდუმზე ხელმოწერით, მხარეები ვადასტურებთ, რომ „სააგენტო“ არ არის პასუხისმგებელი და მას არ შეიძლება მოეთხოვოს პასუხი ისეთ შესაძლო ზარალზე და/ან ზიანზე, რომელიც შეიძლება მიადგეს „მერიას“ და/ან ნებისმიერ მესამე პირს (პირებს), რომელსაც „მერია“ უზრუნველყოფს, ან შეიძლება უზრუნველყოს, ან შეიძლებოდა უზრუნველყო რაიმე სახის (ფულადი ან არაფულადი) სოციალური დახმარებით (ბენეფიტით), რაც შეიძლება წარმოიშვას მონაცემთა ბაზაში არსებულ ინფორმაციაზე (მონაცემებზე) დაყრდნობით „მერიის“ მიერ განხორციელებული ქმედების ან უმოქმედობის შედეგად.

4.2. წინამდებარე მემორანდუმზე ხელმოწერით „მერია“ ადასტურებს მზაობას საკუთარი შესაძლებლობების ფარგლებში თვითონ უზრუნველყოს ნებისმიერი იმ ფიზიკური პირის (პირების) დაკმაყოფილება, რომელსაც შეიძლება მიადგეს რაიმე სახის შესაძლო ზიანი და/ან ზარალი, „მერიის“ მხრიდან განხორციელებული რაიმე მოქმედების ან უმოქმედობის შედეგად, რაც უკავშირდება „მერიის“ მიერ მონაცემთა ბაზაში არსებულ ინფორმაციაზე (მონაცემებზე) დაყრდნობით რაიმე სახის (ფულადი ან არაფულადი) სოციალური დახმარების (ბენეფიტის) გაცემას ან არგაცემას.

4.3. ამ მუხლში აღნიშნული პირობები ძალაში დარჩება წინამდებარე მემორანდუმის შეწყვეტის (გაუქმების, ძალადაკარგულად გამოცხადების) შემთხვევაშიც.

მუხლი 5. დავის გადაწყვეტის წესი

5.1. მხარეთა შორის სადავო საკითხები წყდება მოლაპარაკების გზით, შეთანხმების მიუღწევლობის შემთხვევაში - დავას განიხილავს სასამართლო.

მუხლი 6. ფორს-მაჟორი

6.1. მხარეები არ არიან პასუხისმგებელნი თავიანთი ვალდებულებების სრულ ან ნაწილობრივ შეუსრულებლობაზე, თუ ეს შეუსრულებლობა გამოწვეულია ისეთი გარემოებებით, როგორიცაა წყალდიდობა, ხანძარი, მიწისძვრა და სხვა სტიქიური მოვლენები, აგრეთვე საომარი მოქმედებები თუ ისინი უშუალო ზემოქმედებას ახდენენ მემორანდუმის შესრულებაზე. მემორანდუმის შესრულების ვადა გადაიწევს შესაბამისი დროით, ფორს-მაჟორის გამომწვევ გარემოებათა დასრულებამდე.

6.2. მხარე, რომელსაც შეექმნა ფორს-მაჟორული გარემოება 5 (ხუთი) სამუშაო დღის ვადაში აცნობებს მეორე მხარეს ვალდებულების შეუსრულებლობის მიზეზებს და მათი შესრულების მოსალოდნელ თარიღს, რის შემდეგაც, ნაკისრი ვალდებულებების შესრულება შეიძლება გადაიდოს ფორს-მაჟორის გაგრძელების ვადით ან მემორანდუმი შეწყდეს მხარეთა შეთანხმებით.

მუხლი 7. მემორანდუმის მოქმედების ვადა, ცვლილებების და შეწყვეტის პირობები

7.1. მემორანდუმი ძალაშია მხარეთა ხელმოწერის დღიდან, 2016 წლის 31 დეკემბრის ჩათვლით. იმ შემთხვევაში, თუ კალენდარული წლის დასრულებამდე „მერია“ წერილობით დააფიქსირებს მემორანდუმით გათვალისწინებული ურთიერთობის გაგრძელების სურვილს, წინამდებარე მემორანდუმი ჩაითვლება გაგრძელებულად ერთი კალენდარული წლის განმავლობაში, თუ „სააგენტო“ წერილობით არ დააფიქსირებს მემორანდუმის შეწყვეტის სურვილს. ამ პუნქტით გათვალისწინებული პროცედურა მოქმედებს ყოველი ვადის ამოწურვისას.

7.2. წინამდებარე მემორანდუმის პირობების შეცვლა დასაშვებია მხარეთა ერთობლივი წერილობითი შეთანხმებით.

7.3. მემორანდუმის თითოეული მხარე უფლებამოსილია შეწყვეტოს მემორანდუმი შეწყვეტის თარიღამდე 10 (ათი) კალენდარული დღით ადრე წერილობითი შეტყობინების მემორანდუმის მონაწილე მხარეებისათვის გაგზავნის გზით.

მუხლი 8. სხვა პირობები

8.1. მხარეები ხელმძღვანელობენ ურთიერთპატივისცემის პრინციპით და თანამშრომლობის გაღრმავების სურვილით.

8.2. მემორანდუმის მხარეები ვალდებული არიან გაუფრთხილდნენ თითოეულის სახელს, საქმიან რეპუტაციას და ღირსებას.

8.3. მხარეები ვალდებული არიან დაიცვან ერთობლივი საქმიანობის შედეგად მათთვის ცნობილი მეორე მხარის კონფიდენციალური ინფორმაცია. კონფიდენციალობის დარღვევად არ ჩაითვლება შემთხვევა, როდესაც ინფორმაციის გამჟღავნება წარმოადგენს კანონის ან კანონის საფუძველზე ხელისუფლების რომელიმე ორგანოს მიერ გამოცემული აქტის მოთხოვნას.

8.4. „მერია“ აცნობიერებს მისთვის გადასაცემი (მიწოდებული) ინფორმაციის (მონაცემების) სამართლებრივ სტატუსს, პერსონალური მონაცემების დაცვის მნიშვნელობას, პერსონალური მონაცემების დაცვისადმი საქართველოს კანონმდებლობით დადგენილ მოთხოვნებს და ადასტურებს საკუთარ ვალდებულებას, რომ მონაცემთა ბაზიდან მიღებული ინფორმაცია გამოიყენოს მხოლოდ იმ მიზნების მისაღწევად, რაც საჭიროა, საქართველოს მოქმედი კანონმდებლობით გათვალისწინებული მისი ფუნქციების განხორციელებისათვის და არ დაუშვას მიღებული ინფორმაციის გადაცემა, სხვაგვარად გამჟღავნება ან გამოყენება. წინააღმდეგ შემთხვევაში, სრული პასუხისმგებლობა ეკისრება მერიას.

8.5. მემორანდუმის მხარეებს არა აქვთ უფლება გააკეთონ განცხადება მეორე მხარის მიერ მემორანდუმის ვერ ან არ შესრულების, მისი შესრულებისას დარღვევების ან სხვა მსგავს საკითხებზე, თუ არ მოხდა შესაბამისი ფაქტების დადასტურება.

8.6. წინამდებარე მემორანდუმის ფარგლებში მხარეთა შორის შეტყობინების გაგზავნა შესაძლებელია განხორციელდეს როგორც წერილის გაგზავნით, ისე ელექტრონული ფოსტის მეშვეობით.

8.7. მემორანდუმის რომელიმე პუნქტის/ქვეპუნქტის გაუქმება/ბათილობა არ გამოიწვევს მთლიანად მემორანდუმის გაუქმებას/ბათილობას, თუ იგი დაიდებოდა ასეთი გაუქმებული/ბათილი პუნქტის/ქვეპუნქტის გარეშე.

8.8. წინამდებარე მემორანდუმის ძალაში შესვლის დღიდან ძალას კარგავს „მერიასა“ და „სააგენტოს“ შორის არსებული ნებისმიერი შეთანხმება (ხელშეკრულება, მემორანდუმი და ა.შ.) რაც უკავშირდება „სოციალურად დაუცველი ოჯახების მონაცემთა ერთიან ბაზაში“ რეგისტრირებული ოჯახების (პირების) შესახებ ინფორმაციის (მონაცემების) მიწოდების საკითხებს და ეს ურთიერთობები რეგულირდება წინამდებარე მემორანდუმით.

8.9. წინამდებარე მემორანდუმი გაფორმებულია საქართველოს კანონმდებლობის შესაბამისად და ინტერპრეტირებული იქნება საქართველოს კანონმდებლობის მიხედვით. წინამდებარე მემორანდუმით გაუთვალისწინებელი საკითხები რეგულირდება საქართველოს მოქმედი კანონმდებლობით.

8.10. წინამდებარე მემორანდუმი შედგენილია 6 (ექვსი) ფურცლად, 2 (ორი) ეგზემპლარად, ქართულ ენაზე, რომელთაგან თითოეულს გააჩნია თანაბარი იურიდიული ძალა. მემორანდუმის თითო ეგზემპლარი ინახება მხარეებთან.

მუხლი 9. მხარეთა რეკვიზიტები

„მერია“

„სააგენტო“

ქალაქ რუსთავის მუნიციპალიტეტის მერია

სსიპ – „სოციალური მომსახურების
სააგენტო“


ქ.რუსთავი, კოსტავას N20

ქ. თბილისი, აკაკი წერეთლის გამზირი N144

საიდენტიფიკაციო კოდი
N216433287

საიდენტიფიკაციო კოდი
N202178927


ლ. ლაშა ლობჯანიძე
ქ. რუსთავის მუნიციპალიტეტის მერის
მოადგილე


კობა სიონდულაშვილი
დირექტორის მოადგილის მოვალეობის
შემსრულებელი

6 